

RADNA VERZIJA

Na osnovu člana 15. i člana 16. 1. Zakona o Vladi Zeničko-dobojskog kantona – prečišćeni tekst („Službene novine Zeničko-dobojskog kantona“, broj: 7/10) i člana 36. stav (3) alineja druga Zakona o javno-privatnom partnerstvu („Službene novine Zeničko-dobojskog kantona“, broj: 5/13), Vlada Zeničko-dobojskog kantona, na prijedlog Ministarstva za privredu, na _____sjednici održanoj dana _____2015. godine, donosi

U R E D B U

O nadzoru provedbe projekata javno – privatnog partnerstva

I OPĆE ODREDBE

Član 1.

(Predmet Uredbe)

Ovom Uredbom, uređuju se ovlaštenja Komisije za javno-privatno partnerstvo Zeničko-dobojskog kantona (u daljnjem tekstu: Komisija) u obavljanju nadzora provedbe projekata javno-privatnog partnerstva (u daljnjem tekstu: projekata JPP-a), način postupanja prilikom nadzora provedbe projekata JPP-a, te prava i obaveze ugovornih strana u postupku nadzora provedbe projekata JPP-a.

Član 2.

(Pravo nadzora)

Ovlaštenja Komisije za obavljanje nadzora provedbe projekata JPP-a ne isključuje pravo drugih državnih tijela da iz okvira svoje nadležnosti, nadziru provedbu projekata JPP-a, shodno posebnim propisima.

Član 3.

(Svrha i predmet provođenja nadzora)

- (1) Komisija provodi nadzor u svrhu praćenja provedbe projekata JPP-a i unaprijeđenja izvršavanja ugovorenih obaveza javnog i privatnog partnera u provedbi projekata JPP-a.
- (2) Nadzor se provodi nad svim projektima JPP-a, čija provedba je započela sklapanjem ugovora o javno-privatnom partnerstvu, ili osnivanjem zajedničkog privrednog društva, shodno odgovarajućim odredbama Zakona o javno-privatnom partnerstvu (u daljnjem tekstu: Zakona o JPP-u).

Član 4.

(Način vršenja nadzora)

- (1) U provođenju nadzora, Komisija ima pravo praćenja provedbe projekata JPP-a, te stručnog uvida u provedbu projekata JPP-a.
- (2) Komisija prati provedbu projekata JPP-a, prvenstveno uvidom u izvještaje o provođenju projekta, te uvidom u dokumentaciju u vezi sa provedbom projekta, shodno odredbama člana 6. i 8. ove Uredbe.
- (3) Stručni uvid u provedbu projekata JPP-a, Komisija provodi na mjestu provedbe projekta, na način uređen ovom Uredbom.

Član 5.

(Vrijeme trajanja nadzora)

Komisija provodi nadzor tokom cijelog trajanja provedbe projekta JPP-a.

II PRAĆENJE PROVEDBE PROJEKATA JPP-a

Član 6.

(Dostavljanje izvještaja)

- (1) Javni partner dužan je u roku od šest mjeseci od dana sklapanja ugovora o javno-privatnom partnerstvu, odnosno osnivanja zajedničkog privrednog društva s privatnim partnerom, Komisiji na uvid dostaviti Izvještaj o provedbi projekta JPP-a (u daljnjem tekstu: Izvještaj), koji mora biti potpisan od strane ovlaštenog lica i ovjeren službenim pečatom od strane javnog i privatnog partnera.
- (2) Izvještaj se dostavlja popunjavanjem obrasca koji se nalazi u Prilogu 1., koji je sastavni dio ove Uredbe.
- (3) Javni partner Izvještaj dostavlja svakih šest mjeseci.
- (4) Posljednji Izvještaj dostavlja se najkasnije u roku od šest mjeseci od zadnjeg dana isteka ugovorenog vremena provedbe projekta JPP-a.
- (5) Ukoliko Izvještaj ne bude dostavljen u predviđenom roku, Komisija će pisanim putem zatražiti dostavu Izvještaja, koji mora biti dostavljen u roku od 30 dana, od dana prijema pisanog naloga.
- (6) Komisija na osnovu primljenog Izvještaja može tražiti dodatna objašnjenja, obrazloženja i izjašnjenja ugovornih strana u vezi sa pojedinim navodima iz Izvještaja, te može tražiti na uvid i drugu dokumentaciju, u skladu sa odredbama člana 8. ove Uredbe.

Član 7.

(Način popunjavanja, sadržaj i dostavljanje obrasca)

- (1) Obrazac za dostavu Izvještaja mora se popuniti čitko, hemijskom olovkom ili pisaćom mašinom, odnosno na računaru, pojedinačno za svaki ugovor o javno-privatnom partnerstvu.
- (2) Obrazac propisan ovom Uredbom dostupan je u elektronskom obliku na internet stranici Vlade Zeničko-dobojskog kantona – Ministarstvo za privredu – Komisija za JPP.
- (3) Popunjen obrazac za dostavu Izvještaja podnosi se kao preporučena pošiljka s povratnicom. Popunjen obrazac u elektronskom obliku, shodno odredbama posebnih propisa kojima se uređuje upotreba elektronskih isprava, podnosi se na elektronsku adresu: min.privreda@zdk.ba.

Član 8.

(Dostavljanje dokumentacije)

- (1) U svrhu obavljanja nadzora, Komisija može od ugovornih strana u bilo kojem trenutku zatražiti dostavu dokumentacije, koja se odnosi na provedbu projekata JPP-a iz člana 22. Zakona.
- (2) Ugovorne strane dužne su u roku od 30 dana od dana prijema zahtjeva iz stava (1) ovog člana, Komisiji dostaviti tražene dokumente.
- (3) Pošto primi dokumentaciju iz stava (1) ovog člana, Komisija može zatražiti dodatna objašnjenja, obrazloženja i izjašnjenja ugovornih strana i/ili obaviti neposredan stručni uvid (u daljem tekstu: uvid).

III STRUČNI UVID

Član 9.

(Obavljanje stručnog uvida)

- (1) Komisija, ili lice koje Komisija ovlasti u svrhu provjere navoda iz primljenog Izvještaja iz člana 7. ove Uredbe, može obaviti uvid na mjestu provedbe projekata JPP-a.
- (2) Na osnovu izvršenog uvida, sastavlja se zapisnik.
- (3) Zapisnik obavezno mora sadržavati podatke o projektu nad kojim je proveden uvid, o ugovornim stranama, vremenu provođenja uvida, razlogu i načinu provođenja uvida,

dokumentaciji na osnovu koje je proveden uvid, uočenim nepravilnostima, te podatke o licu koje je provelo uvid, a po potrebi može sadržavati i druge podatke.

IV OBAVIJEST I PREPORUKA O OTKLANJANJU NEPRAVILNOSTI

Član 10.

(Otklanjanje nepravilnosti)

- (1) Ukoliko na osnovu provedenog nadzora, Komisija uoči nepravilnosti u provedbi projekta JPP-a, o tome pisanim putem obavještava javnog i privatnog partnera.
- (2) Obavijest o uočenim nepravilnostima sadrži i preporuke o načinu otklanjanja uočenih nepravilnosti.
- (3) Ugovorne strane su obavezne, najkasnije u roku od 15 dana od dana prijema preporuka iz stava (2) ovog člana, izvijestiti Komisiju o aktivnostima poduzetim u svrhu otklanjanja uočenih nepravilnosti.
- (4) Nepravilnostima iz stava (1) ovog člana, podrazumijevaju se sva odstupanja od ugovorenih prava i obaveza javnog i privatnog partnera, do kojih je došlo u provedbi projekta JPP-a, a koja ugovorom o javno-privatnom partnerstvu nisu predviđena.
- (5) Komisija će o uočenim nepravilnostima obavijestiti druga nadležna državna tijela.

V ZAVRŠNE ODREDBE

Član 10.

(Stupanje na snagu Pravilnika)

Uredba stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj:

Datum, __.__.2015. godine

Z e n i c a

PREMIJER

Miralem Galijašević

Prilog 1.

OBRAZAC ZA DOSTAVU IZVJEŠTAJA O PROVEDBI PROJEKTA JPP-a

1. Predmet i naziv ugovora JPP-a		
2. Javni partner (naziv, adresa, identifikacioni broj)		
3. Privatni partner (naziv, adresa, identifikacioni broj)		
4. Dužina trajanja ugovora		
5. Da li javni partner plaća iznos ugovorene naknade (ukoliko je naknada ugovorena), period 6 mjeseci	DA	NE (pjasniti razloge)
6. Da li javni partner izvršava druge ugovorene obaveze, period od 6 mjeseci	DA	NE (pjasniti razloge, te preduzete mjere)
7. Da li je privatni partner pružao ugovoreni standard kvaliteta usluga, period 6 mjeseci	DA	NE (pjasniti razloge)
8. Da li je privatni partner izvršavao druge ugovorene obaveze, period 6 mjeseci	DA	NE (pjasniti razloge, te preduzete mjere)
9. Da li postoji spor, period 6 mjeseci	DA (pjasniti razloge)	NE
10. Ako postoji spor, da li je pokrenut postupak rješavanja spora	DA (pjasniti trenutni status rješavanja spora)	NE (pojasniti razloge)
11. Da li postoji plaćanje ugovorenih kazni ili umanjenje ugovorenih naknada zbog neizvršenja ugovorenih obaveza	DA (pjasniti razloge plaćanja ugovorenih kazni i trenutni status)	NE
12. Ostale napomene		

Javni partner:

.....

.....

(potpis i pečat)

Privatni partner:

.....

.....

(potpis i pečat)

O B R A Z L O Ž E N J E

1. Pravni osnov

Pravni osnov sadržan je u članu 36. stav 3. alineja druga Zakona o javno-privatnom partnerstvu („Službene novine Zeničko-dobojskog kantona“, broj: 5/13) kojim je propisano da Vlada Zeničko-dobojskog kantona, na prijedlog Ministarstva za privredu, donosi Uredbu o nadzoru provedbe projekata javno-privatnog partnerstva.

2. Obrazloženje predloženih rješenja:

- Članom 1. Uredbe, propisan je predmet Uredbe,
- Članom 2. Uredbe, propisan je sadržaj ovlaštenja,
- Članom 3. Uredbe, propisana je svrha provođenja nadzora,
- Članom 4. Uredbe, propisan je sadržaj nadzora i način vršenja nadzora,
- Članom 5. Uredbe, propisan je rok trajanja nadzora,
- Članom 6. Uredbe, propisana je obaveza dostavljanja izvještaja o provedbi projekta JPP-a,
- Članom 7. Uredbe, propisan je način popunjavanja, sadržaj i dostavljanje obrazaca za dostavu izvještaja,
- Članom 8. Uredbe, propisano je obavljanje stručnog uvida,
- Članom 9. Uredbe, propisano je otklanjanje uočenih nedostataka
- Članom 10. Uredbe, propisano je stupanje na snagu Uredbe.

3. Potrebna finansijska sredstva

Za provođenje ove Uredbe, nisu potrebna posebna finansijska sredstva.